

**Namminersornerullutik Oqartussat missingersuutaat pillugit Inatsisartut
inatsisaata nr. 8-ip 29. oktober 1999-imeersup allanngortinneqarneranik
Inatsisartut inatsisissaattut siunnersuut**

pillugu

ISUMALIUTISSIISSUT

Inatsisartut Inatsisit Atortinneqarnerannut Ataatsimiititaliaannit

**inatsisissatut siunnersuutip aappassaaneernejarnissaanut
saqqummiunneqartoq**

Inatsisartut Inatsisit Atortinneqarnerannut Ataatsimiititaliaat suliarinninnermini ukuninnga inuttaqarpoq:

Inatsisartuni ilaasortaq Anders Andreassen (S), siulittaasoq
Inatsisartuni ilaasortaq Olga Poulsen (IA)
Inatsisartuni ilaasortaq Lars Karl Jensen (S)
Inatsisartuni ilaasortaq Anders Nilsson (A)
Inatsisartuni ilaasortaq Anthon Frederiksen (K)

Siunnersuut saqqummiunneqartoq naapertorlugu aningaasanut inatsisip akuersissutigineqarnissaa "1. december nallertinnagu" pisartussanngorlugu kinguartitsisoqassaaq.

Siunnersuut Inatsisartut ukiakkut ataatsimiittarnerisa kinguartinneqarnissaannik Naalackersuisuniit kissaateqartoqarnera tunngavigalugu saqqummiunneqarpoq, tassa Inatsisartut ataatsimiilernissaat qaammammik ataatsimik sioqqullugu ullormut oqaluuserisassanngortinniakkanik tunniussereersimanissamik piffissaliinerup kingunerissammagu Naalackersuisut inatsisiliassanik piareersaanerata ilangaatsiarsuata aasaanerani sulinngiffeqarnerup nalaani (taannaluunniit sioqqullugu) pisarnissaa, Naalackersuisullu isumaat naapertorlugu tamanna pitsaavallaarnaviangilaq.

Tamatuma kingunerisaanik Inatsisartut 2000-imi upernaakkut ataatsimiinneranni Kalaallit Nunaanni Inatsisartut Suleriaasiannut allannguutissatut siunnersuummik

saqqummiussisoqarpoq. Siunnersuutip kingunerisaanik piffissaq Inatsisartut ukiakkut ataatsimiinnerata aallartittarfissaa septemperi qaammataani tallimangornerit aappaanniit pingajuannut kinguartinneqassaaq. (Taamaammat Inatsisartut Suleriaasiata allannguuteqarneratigut Inatsisartut ukiakkut ataatsimiilernerata ullut 14-it tikillugit kinguartinneqartussaananerik missingersuusiortarnermut inatsisip allangortinneqarnissaanik siunnersuummut saqqumiussissummi oqaaseqaatitaanilu oqartoqarmat tamanna eqqortuunngilaq. Taamaallaat sapaatip akunneranik ataatsimik kinguartinneqassaaq).

Taamatulli kinguartitsinerup kingunerissavaa piffissaq aningaasanut inatsisip akuersissutigineqareersimaffissaa kinguartinneqanngippat piffissap Inatsisartut aningaasanut inatsimmik suliarinniffissaata sivikillinera. Naalakkersuisut tamanna qissimigaarlugu siunnersuutigaat piffissaliussaq pineqartoq qaammammik ataatsimik kinguartinneqassasoq.

Inatsisit Atortinneqarnerannut Ataatsimiititaliap tusarniaanernit akissutit Naalakkersuisut inatsisissatut siunnersuutip uuma saqqummiunnera sioqqullugu oqartussaasunit kattuffinnillu il. il. pissarsiarisimasaasa nuutinneri siunnersuutip suliarinerani atugassamisut pissarsiarisimavai.

Inatsisit Atortinneqarnerannut Ataatsimiititaliap paasivaa tusarniaaffigineqartut uku akissuteqarsimasut:

Kultureqarnermut, Ilinniartitaanermut, Iisimatusarnermut Ilageeqarnermullu Pisortaqarfik aamma KANUKOKA. Oqaatigineqarportaaq inatsisissatut siunnersuut Naalakkersuisut Allattoqarfiata inatsisilerisoqarfianut oqaasiinnartigut oqaloqatiginnissutigineqarsimasoq.

Missingusiaq allakkatigut martsip 17-ianneersutigut tusarniaassutigalugu nassiunneqarsimavoq, ullorlu akissutit tigueqareersimaffissaat martsip 23-annut killilerneqarsimalluni.

Inatsisit Atortinneqarnerannut Ataatsimiititaliap oqaatigissavaa isumaqarluni piffissaliussaq taanna akuersarneqarsinnaanngitsumik sivikippallaarujussuortoq.

Minnerunngitsumik KANUKOKA-mut tunngatillugu pissutsit taamaapput, taassumami tusarniaaffigineqaraangami inatsisissatut siunnersuutip pineqartup kommuninut ataasiakkaanut saqqummiunnissaanut naammattumik piffissaqartinneqartarnissaa pisariaqarpoq.

Inatsisit Atortinneqarnerannut Ataatsimiititaliap tusarniaanernit akissutinik tunniussinissamut piffissaliussat sivikippallaartarneri arlaleriaqaluni isornartorsiortarpai - kingullermillu taamaaliorluni Namminersornerullutik Oqartussat missingersuutaat pillugit Inatsisartut inatsisissaattut siunnersuutip Inatsisartut 1999-imi ukiakkut ataatsimiinneranni ataatsimiititaliamit suliarineqarneranut atatillugu. Taamaammat ataatsimiititaliap assut ajuusaarnartippaa paasigamiuk inatsisissatut siunnersuutit tusarniaassutigalugit nassiunneqaraangata akissuteqarnissamut piffissaliunneqartartut suli ima sivikitsigisut allaat oqartussaasut

kattuffiillu attuumassuteqartut tusarniaaffigineqarnerminnit akissutinik imaqarluartunik saqqumiussinissaminut periarfissaqartinneqartaratik. Innuttaasut oqartussaaqataatillugit naalackersuinikkut ingerlaatsimi tunngaviit inatsisiliillu pitsaasuunissaasa innimiginissaat taamaaliornikkut sumiginneqartarput.

Tamanna tunngavigalugu Inatsisit Atortinneqarnerannut Ataatsimiititaliap Naalackersuisut kaammattussavai inatsisissatut siunnersuutit, siunnersuutit soorpiarneri apequtaatillugit, sapinngisamik sivikinnerpaamik sapaatip akunnerinik sisamanik akissuteqarnissamut piffissaliilluni tusarniaassutigalugit nassiunneqartarnissaat qulakkeeqqullugu.

KANUKOKA'p tusarniaaffigineqarnermini akissutaani atuarneqarsinnaavoq kommunit arlallit siunnersuut annertuumik nangaanartoqartikkaat. Tamatumani pingaartumik innersuussutigineqarpoq aningaasatigut missingersuusiassanut siunnersuutip Inatsisartut ataatsimiinnerini oqaluuserineqarnerani, sanaartugassat ingerlatsinermullu aningaasartuutit eqqarsaatigalugit, kommunit aningaasatigut missingersuusiaannut sunniteqartunik allannguuteqarajuttarnera.

Taamaammat KANUKOKA'p inassutigaa tulleriinneri malillugit Namminersornerullutik Oqartussat missingersuusianik akuersissuteqartarnerisa kommunillu aningaasatigut missingersuusianik akuersissuteqartarnerisa qaammammik ataatsimik nikinganerat aalajangiusimaannarneqassasoq.

KANUKOKA'p tusarniaaffigineqarnerminit akissutaa isumaliutissiisummut uunga ilanngussatut ilaatinneqarpoq.

Kommunit aningaasatigut missingersuusiamik suliarinerini naammaginartunik atugassaqartinneqarnissaat Inatsisit Atortinneqarnerannut Ataatsimiititaliamit pingaartutut isigineqarpoq. Taamaammat Inatsisit Atortinneqarnerannut Ataatsimiititaliap KANUKOKA'p oqaaseqaatai annertuumik isumalioriarnartutut isigai.

Inatsisilli Atortinneqarnerannut Ataatsimiititaliap maluginiarpaa Naalackersuisut kommunit aningaasatigut missingersuusiornerini ajornartorsiuteqartoqalinnginnissaata qulakkeerniarneqarnissaa kommunit ataqatigiissaareqatiginerisigut anguniarniaa.

Inatsisit Atortinneqarnerannut Ataatsimiititaliap tamatumunnga peqatigitillugu aningaasanut inatsisissaq pillugu isumaqatigiinniarnarit naalackersuinikkut oqallinnissanut piffissaqarsinnaanngorlugu aaqqissuunneqartarnissaat pingaartippaa aammalu innuttaasut soqutigisaqatigiikkuutaallu tamanut ammasumik oqallinnissaminut, taamaalillutillu naalackersuinikkut isumaqatigiinniarnernut sunniteqarsinnaanissaminut, mattunneqannginnissaat pingaartillugu.

Tamanna tunngavigalugu Inatsisit Atortinneqarnerannut Ataatsimiititaliap isumaqatigiittup piffissap aningaasanut inatsisip akuersissutigineqarfissaata kinguartinneqarnissaata akuersissutigineqarnissaa taperserpaa. Ataatsimiititaliap ullunik 14-inik kinguartsisoqarnissaa taperserpaa, taamaalillunilu piffissap

aningaasanut inatsisip akuersissutigineqarfissaata "15. november nallertinnagu"
pisartussanngorlugu aalajangiiffigineqarnissaa taperserlugu.

Taamaammat ataatsimiititaliap iluarisimaarlugu paasivaa Naalakkersuisut
allannguutissatut siunnersuutunik ataatsimiititaliap kissaataanut naapertuuttunik
siunnersuutip matuma aappassaaneerneqarnissaanut saqqummiussilersaartut.

Inatsisit Atortinneqanerannut Ataatsimiititaliap isumaqatigiittup inassutigissavaa
Namminersornerullutik Oqartussat missingersuutaat pillugit Inatsisartut inatsisaata
allanngortinneqarneranik Inatsisartut inatsisissaattut siunnersuut Naalakkersuisut
allannguutissanik taaneqartunik saqqummiussereerpata iluseriligassamisut
iluseqarluni Inatsisartunit akuersissutigineqassasoq.

Anders Andreassen,
Siumut
Ataatsimiititaliap
siulittaasua

Olga Poulsen, Inuit
Ataqatigiit

Lars Karl Jensen, Siumut

Anders Nilsson, Atassut

Anthon Frederiksen,
Kattusseqatigiit